

四庫全書

集部

欽定四庫全書

集部
滄海遺珠卷四

三

詳校官中書

臣瞿照

助教

臣常循覆勘

覆校官編修

臣沈孫璉

校對官中書

臣田尹衡

謄錄監生

臣何永濤

欽定四庫全書

滄海遺珠卷二

明 沐昂 編

王景彰

以字行
括蒼人

題江南秋晚圖

十年不踏錢塘路江上晴烟渺輕素并刀誰剪秋半簾
夕陽正在西陵樹對之便欲發浩歌西風蕭蕭水增波
胥濤已入亂山去木落臺空幽思多

瑶臺翫月

瑶臺臺上秋月明
瑶臺臺下秋水清
道人持杯待月出
氣壓泰華吞滄溟
嫦娥靚粧倚東井
碾破琉璃幾千頃
興來吸盡金巨羅
舞袖徘徊弄清影
衷腸激烈問青天
何似當年李謫仙
迢迢雲海望不極
不知天上今何年
玉階桂花下如霰
瑶光欲墮明星爛
微霜漂漂沾人衣
城上烏啼知夜半

羅盤書屋

羅盤山色連青冥羅盤花開春滿城邇來文軌遍南服
構得書屋山之扃中有牙籤三萬軸隸古漆書聯汗竹
琬琰新收漢石經黌序亦開唐白鹿要將禮樂化殊方
夜深絃誦聲琅琅已聞文翁教岷蜀此邦更在岷之陽
岷山之水向南流織女機絲涵素秋豈徒風氣開太朴
終看德化齊中州羅盤書屋世無有今度有書垂不朽
不是蓮花幕下賓安得文光貫南斗

劍閣圖

劍閣雲棧高嵯峨嘉陵江水揚清波神扃鬼鑿閔幽閒
秋風古道無人過一朝日華忽西被宇宙淋漓盪元氣
霆轟飈舉神龍逝山川草木皆生意乃知世道有晦明
蜀山萬仞如砥平聖人在位四海清

題畫扇

二儀開混沌一氣蘊精靈石乳通龍井天風老鶴汀江
山自吳楚寰宇際滄溟便欲拋塵俗尋真向草亭

賀西平侯大人平越州

元戎承制掃蠻方踏遍先王舊戰場又見孔明擒孟獲
何殊充國破西羌捷書入奏風雲動凱騎揚塵日月黃
聖主萬年垂大統海山無地不梯航

題畫

聞說蓬萊水已枯懶從海上拾珊瑚山前石爛雲生母
天際禽飛雪作姑三尺清冰雷煥劍一杯元氣長房壺
此中盡是瓊林侶何事年來不寄書

題畫草木奇峰

蒼虬飛上天鱗鬣墮深麓長風吹不起散作千山綠

題畫馬

天上房星燭地寒故教駿骨落人間如今紙上空形影

曾在秋風十二閑

樓璉

字士連
金華人

采蓮曲

妾學采蓮蓮始花花顏與妾爭春華妾有朱鉛為郎飾
不學爾花徒弄色秋霜一夜花無主妾憶行郎淚如雨

暗卜行郎何日歸
定是蓮房結子時

題深上人松月軒

夜月明松頂
軒居不掩扉
石泉沉濕翠
碧瓦弄晴暉
林靜猿初息
巢空鶴未歸
此中凝坐者
寒沁薜蘿衣

送鏡中照上人兼柬斗南和尚

舊住扶桑第幾山
偶然踪跡落人間
蘿衣拂露辭秋壑
藤杖扶霜度曉關
滇海飛來孤月小
點蒼留得半雲閒
殷勤為報圓通客
鶴背清風好共還

王汝玉

名璣以字
行蜀人

送別

綠水滌汀洲風起江南秋
烟波有孤客闕河生遠愁
遠愁那足說惜此芳華歇
日暮淡忘歸蘋花悵難擷

脩竹美人圖

蘭膏香膩盤雲綠愁鎖春山黛
痕蹙天寒日暮悄無言
翠袖盈盈倚脩竹脩竹無心亦有情
竹花結實珠繁榮
秦樓人去彩鸞杳湘江種得相思成
相思有種何時歇

竹上年年怨離別千古魂銷怨不銷淚紅染作鴛鴦血
和高季迪將進酒

君不見雲中月清光乍圓還又缺君不見枝上花容華
不久落塵沙一生一死人皆有綠髮朱顏豈能久樽前
但使酒如澠肘後何須印懸斗咸陽黃犬悔已遲至今
千載令人嗤試看古來功業士何如陌上冶遊兒百年
飄忽寄宇內日日歡娛能幾歲勸君莫惜囊中金便趁
生前常買醉臨卣壚頭綠蟻香柳花捲雪春茫茫吳姬

越女嬌相向痛飲須盡三千觴興來狂笑縱所適慎勿
畏他權貴客東風吹落頭上巾此日獨醒端可惜一朝
綺羅生網塵粧樓空鎖青娥人酒星不照九泉下孤鳥
自唳山花春解我金貂脫君素裘白日既沒秉燭遨遊
君為我舞我為君歌歌舞相合其樂如何

湘竹簫歌

君家洞簫天下奇碎紅亂點香淋漓濃如丹砂沁冰肌
淡似猩血封瓊枝持來世人莫能識疑是秦王女兒之

所貽幾回吹向霜江曉皎月不明風悄悄一聲捲入碧
雲中驚散飛鴻落天表君不見重華去兮歸路遙二妃
泣向湘江皋江皋之竹竹間淚萬古千年長不消我將
挾君攜此同上黃鶴樓醉弄一曲離鸞秋曲終飛度洞
庭去試聽蒼梧猿夜愁

春曉美人圖

梨花埭上雞鳴早十二瓊樓天乍曉東風不動綠楊綠
雲母窓空春悄悄銀屏複帳掩鮫綃遮斷蓬山海路遙

鬢亂釵橫雙鳳。顰玻璃枕上。不勝嬌。誰將鸚鵡偷調弄。
驚散瑤臺合歡夢。金盤仙掌。日華高。小苑花枝露痕重。
小玉熏殘蘇合香。臨鸞先學理新粧。含情欲起嬌無力。
滿院綠陰清晝長。

題畫

疎烟帶平野。閑花落空林。雞聲在何許。人家春樹陰。將
尋丘中侶。諧此塵外心。幽期倘云遂。寧惜露沾襟。

新秋早朝

宮井梧桐一葉飛
新涼先到侍臣衣
蒼龍闕上銀河轉
丹鳳樓頭玉漏稀
曉仗分行環御輦
夕郎鳴珮出仙闈
自憐虎觀叨陪從
簪筆慙無補萬機

左掖聞鶯和鄭孟宣助教

落絮飛花滿禁城
萬年枝上一鶯鳴
全非幽谷間關調
總是東風宛轉聲
啼處尚含求友思
斷時猶帶惜春情
朝回左掖門前聽
却訝簫韶奏九成

送太平劉知府復任

錦綉江山拱帝畿
先皇曾此駐龍旗
三年出守勞綏撫
再命專城遇眷知
桑柘千村豐庶日
歌鍾萬戶太平時
送君重去宣王化
明世誰論治繭絲

送鄭尚書致仕

重沐天恩典
禮闈旋因賜告解
朝衣先朝故老今誰似
十世同居古亦稀
綠水蘭舟江上發
秋風華髮浦陽歸
懸知戀闕心應切
夜夜山中夢紫薇

客懷

零落棲遲一病人鶯花正遇帝城春途窮不肯輕垂淚
道在長甘固守貧陋巷草深前夜雨空齋翫掩昨宵塵
杜陵何事真愚拙却欲虞廷自許身

逢掖雖云是舊衣故山終負採春薇時清嬾上王通策
病久常閑董子幃寰宇同逢新節至江湖自覺故人稀
半生多少關心事空學莊生蝶亂飛

瓜洲道中

清江香香水連空江北江南綠映紅三月異鄉逢換火

經春遊子怨飄蓬滿汀蘆葉孤舟雨一樹梨花小旆風
遙望故山何處是依稀烟樹五湖東

早朝待漏題楊諭德竹

禁鐘纔動曉風微新竹疎疎對瑣闥非是日高簾不捲
怕教空翠濕朝衣

題畫

渡頭初唱采蓮歌南浦西風漲綠波正是晚涼新雨後
青山不似白雲多

方壺畫

紫府深沉白晝閑
仙人歸去邈難攀
當時暫謫來塵世
寫遍江南雨後山

題天師竹

上清仙子晉風流
愛竹還同王子猷
猷寫得一枝清似玉
湘濱露冷夜來秋

林塘佳趣

自脫荷衣別五湖
秋風幾度惜尊鱸
玉堂酒醒青綾薄

金少隱詩集卷二
空憶林塘舊釣徒

題竹贈別呂希暘從役

露莎烟草滿晴川
罷釣歸來暫泊船
非是野情忘世事
閑愁不到白鷗邊

題倪元鎮畫荆溪清遠圖

銅官山下縱清遊
每為飡松十日留
吹斷玉簫人去久
暮雲空鎖洞庭秋

清悶高人一散仙
常留遺墨世間傳
當時曾寫相思意

誰信如今重惘然

逌祖

字光古
單懷人

畫眉

妾欲畫短眉恐不宜時伴
妾欲畫長眉恐人笑疎散
請郎臨粧臺隨意畫長短

舟下淮水

伐鼓下淮津川光回暮色
數峰雲間青一鳥沙上白
悠悠水驛浮颼颼風帆側
舟人不敢停知我歸朝客

宿山中寺

山中有蘭若龍象輝金碧泉邊佳茗香竹下幽人迹
堂新瓦易茅砌古苔侵石喜為老僧留同坐風雨夕

德公院

翛然青蓮宇水遶山相向老僧不出門林下樂清曠
今日有誰來題詩在竹上

閨怨

露華粉濕啼清曉井梧涼思風嫋嫋珠簾不捲玉鈎垂

當窓嬌語青禽小榴裙半皺睡新起臨鏡芙蓉裊秋水
侍兒為整綠雲鬟不使蘭膏污纖指堂中寶瑟柱新移
一曲未終顰黛眉薄情自是遲歸得翻恨人間有別離

芙蓉辭

碧空零下露漙漙深院風回簾幙寒初日弄光曲池上
琉璃甃瑩雕闌干妖姬睡起淨粧洗顧影盈盈媚秋水
可憐傾國默含情下蔡陽城迷惑死一笑嫣然忽向人
胭脂肌肉綠羅裙相逢不忍遽相捨只恐飛歸化綵雲

使回沂州

穆陵關下路數騎復南歸
雲氣來蒙羽人烟入海沂
晚田禾刈盡霜樹葉凋稀
家擬明朝到吟鞭可緩揮

訪友人居

攜書訪故人豈憚往來頻
潭淨開天鏡山昏著霧巾
林居常掃葉石徑不吹塵
幽僻宜淪隱時時得句新

郊墟池館

何人小池館閑得在郊墟
花晚留栖蝶萍朝見躍魚
幽

塢滋蘚暈老竹帶虫書自計無錢買憑誰可借居

晚宿王衡家

應役城中久何能得避喧登樓山遶縣出郭樹連村僧
舍竹松院人家瓜果園晚來投舊館童子笑開門

遊廣東清遠峽山寺

寂寂長林下僧房鎖碧苔樹枝猿掛折花片鳥銜來池
溢流過水爐存熱後灰賦詩殊未就徙倚故遲回

登浪穹縣護民寺

浪穹西阜寺獨眺有餘情落日秋山色西風古樹聲征
衣憐舊弊客路喜新晴洗鉢焚香事誰能了此生

遊寺寄統有宗集仲祥

出郭獨閑行招提可散情雲來羣壑暗日下半川明靜
院莓苔色深林鳥雀聲新茶僧採得更汲澗泉烹

古淵房閑書和韻

禪房碧樹深坐久語幽禽葉罽日穿透林端雲過陰筆
新微蘸墨書故少生蟬僧有思鄉者時時亦起吟

月堂室中閑題

清心投靜室童子啓雲闌秋色老著樹夕陽明在山高
崖泉落響遠漢鳥飛還擾擾紅塵裏無如僧最閑

簡澤雨田

花時曾惜別菊後又相逢落日深山道清風古寺鐘往
來非定跡彼此是衰容何日隨師去栖禪共竹松

喜總戎班師

大將征夷去夷歸堂府中干戈如不息勲績有何公兵

洗古交雨馬嘶南詔風若論功第一比者孰能同

呂氏水石居

可愛閑居事事幽陰森水石帶林丘風來擺樹花飄席
客到開窓山入樓獨鶴立當生蘚地雙鷗浮近采菱舟
怡怡兄弟同行樂更看詩章且唱酬

江堤晚眺

江堤聊上適離情葭莢無窮一望平遠樹天邊歸鳥沒
孤村雨外夕陽明海門帆過衝秋色沙浦潮來作怒聲

佇立南雲重回首依微尚見晉陵城

晚思

斜日下岩阿山家暗翠蘿浮鷗臨水立啼鳥在林坡溪
上無人渡秋風揚素波

涉溪

晝涉溪方淺暮臨溪忽深水猶如此變安可測人心

平顯

字仲微
虎林人

光霽堂

碧雞翠鴻濛夕影倒滇水月出金馬東徘徊白雲裏夷
峻堂既崇爽塏塵不起書罷承素輝琴露滋鳥喜我公
黔寧嗣世濟忠孝美容光照隙罅於焉燭斯理悵望珠
履榮老客思未已何當駕長風一溯秋萬里

玉盤驪珠

玉盤驪珠何所名琵琶斲出滇陽城昆侖小鳳遏雲叫
鷄雞拔筋寒水精千年紫檀作人語霹靂輓堂驚破柱
黃河曲折走春冰白日簷牙墮秋雨老夫舊住西陵橋

聽此不覺神飄搖初疑鶯在蘇堤柳忽爾驟變錢塘潮
鴻門夜斗紛然碎天遣鮫人泣清淚玫瑰火齊響棖
跳入空明唾壺內牂牁之山產白銅此材此藝真良工
何當別作清廟器明來進入蓬萊宮

謝惠朱宣仲畫

滇之海子三百里天閼靈奇甲南紀環海羣峰秀而峙
翠削芙蓉影秋水漸漸之石上砥平呼以玉案非虛名
琉璃凝滑夜光冷拂手可拾天邊星碧雞飛來據坤酉

散花金仙堪其首拱伏朝尊勢前後霧鬢烟鬟鬪妍醜
荆闕老死骨已枯誰能寫之為作圖癯然老瞍生東吳
炯炯岩電雙清臚解衣盤礴運天巧笑舐霜毫眺清曉
目擊心存明了了秋毫遠見孤白鳥掃素卷碧歸高堂
上公寶玩怡清揚飛臺峭壁宛在望欲援南斗斟天漿
彷彿飈梯幾千丈鉄杖鳴敲洞門敞分我蒼崖一幅雲
老病醒然致蕭爽青林白屋晚可依淋漓滿壁恩光飛
松花雲津久相待竟疑坐此漁舟歸

題水月亭卷

積陰之氣凝不流澄輝上薄蟾宮秋靈媧鍊雪補天罅
六合幻一琉璃溫溫光滉漾燭銀浦三山歷歷明可數
寶奩開影出素娥桂露飛香洒黎母先生獨坐海上亭
肝膽瑩若梅花冰初疑驪珠起甍社熟視坎德交金精
六鰲伏穴不敢動天地無波一泓凍玉螺沆瀣漱玄津
鐵網珊瑚注清夢紫鵬飛來翼垂雲藥成兔鼎許見分
先生跨鵬擘雲去麻姑已約南溟君

次陳東之韻題夏珪溪山清遠卷

畫家粉墨元精好賞鑒誰能察毫秒良由天質發自然
慘淡經營信揮掃珪森父子鳴趙季丘壑胸襟氣深杳
墨捲波濤滄海立筆縮烟雲天地小冥搜遠寄作此圖
繹思通靈古來少東南四萬八千丈玉室瑤臺勢傾倒
北歸有客懷故鄉悵望清猿與幽鳥空悲白髮歲年徂
不得癡兒公事了神遊翠壁攬長蘿夢濯靈谿藉纖草
金庭之魂可些招應躡玄蹤追二老

喜曾翰林奉使交趾回二首

日月無私照乾坤有至仁玉堂徵使者銅柱勞王臣
星入龍編野風清蜚海塵歸來公事了黃閣重絲綸
北極奎章煥南交使者歸雕題瞻禮樂象齒貢京畿
聽漏趨青瑣停驂解繡衣上林春色好官柳正依依

寄演此宗

秋風起江漢纖月在西南影落清滇水涼生白石龕
唱酬蔬筍氣夢寐葛藤談未遂依禪寂徒慙雪滿簪

憶滇春

顆金螺貝馬蹄鹽萬井高甍截畫簷比屋絃歌春皞皞
籠街燈火夜厭厭風花獻媚熏青眼雪絮飛香點紫髯
記得賦詩滇海上硯池影蘸碧雞尖

謝寄符

百道仙符下武當電光隨繞讀書堂詩魔懼挾文窮遁
酒聖靈驅瘧鬼藏墨汁潤分瑶草色篆文清帶柳花香
壁琴自此如神助長覺風霆響洞房

題黃鶴山人王叔明畫

我昔見之湖上居
當門萬朶翠芙蓉
承平公子有故態
丈敏外孫多異書
閑吮彩毫消白日
夢騎黃鶴上清虛
此圖定倚吳山閣
醉點南屏春雨餘

題丁野夫畫

胡丁已沒四十載
化鶴歸來知是非
郭外梅村更地主
筆端松石見天機
一時好手不可遇
千古賞音如此稀
長憶西湖舊遊處
畫船清雨白鷗飛

王真竹居

王維世有竹里館青士滿庭如植麻掃蟻斷根移客榻
瘞猫分笋過隣家琴聲響度偏諧律鶴夢醒餘或煮茶
清曉屢斫枝上露坐看兒子寫梅花

釣絲風

不隨紅雨畫闌春長趁漁蓑起白蘋晴拂太虛雲影亂
暝牽波底月鈎新漂搖萍葉沉香餌勾引蘆花落醉裊
莫笑扁舟湖海窄一竿吹盡利名塵

謝黏衫

新染滇波色未乾
毳茸香絮暖成團
行春不濕杏花雨
踏雪可衝梅信寒
捲霧遠來天
萬里壓風高
卧日三竿
客過坐席真溫厚
獨愧才名亞冷官

送陳孟顥先生歸鄞

小舸乘春指四明
落花新水到西亭
豹歸霧谷深藏彩
鶴倚風巢細刷翎
芳餌再投東海釣
草堂無愧北山靈
老龜堵得藜床穩
卧看芙蓉萬朶青

金少卿公大人
卷二
奉國公大人

路入分茅是傘圓夢迷銅柱瘴雲邊鐵衣觸暑應三捷
綵杖鞭春又一年公子上京婚閥閱將軍南海戰樓船
好音計待朝天使定及新正進表箋

次韻春日京華

霽雪初融上苑花蓬萊佳氣曉成霞白頭擬獻河清頌
四海車書正一家

次韻舟中

鐵舳樓船發禁堤
峭帆高矗與雲齊
芙蓉菡萏秋江上
看盡天葩錦萬機

題士女

周南聲教美洋洋
比屋絃歌窈窕章
一點蕙心清若水
綠陰闌檻畫薰香

滄海遺珠卷二

欽定四庫全書

滄海遺珠卷三

明 沐昂 編

胡粹中

名由以字
行山陰人

古意

四時既平分二氣亦均施草木悅春暉霜露亦凋瘁舒
慘貴適宜好惡初不計恩多易生怨威褻忘敬畏治世
以大德小惠所不貴賢哉諸葛公斯言深有味

詠懷二首

惠風扇微和天宇亦澄霽欣欣草木榮歷歷江山麗開
渠泉脈動入澗水聲細交交飛桑扈角角聞雉閑居
讀古書俛仰唐虞際聖賢吾所師其人惜已逝

君子居高位小人在草野借問古來人誰為百歲者為
樂當及時芳春足遊冶一生真大夢萬事盡虛假憂來
對明鏡清淚數行灑獨有七絃琴情性可陶寫

題青山白雲圖

青山之中有白雲古今能畫者數君南宮房山去已久
高步獨數朱山人山人於畫但適意閑中翰墨恣遊戲
下筆江山千萬重妙入天機奪元氣昨日王家飲酒醒
寫出會稽山陰之蘭亭尖峰削圭插天出長松偃蓋垂
雲青想當暮春三月初天氣清明景物舒流觴曲水發
高詠一代名士今何如涼烟夕草總陳跡留得斯文數
行墨魯魚亥豕何其多一片誰存晉朝石右軍孫子復
才賢宦遊萬里西南天石田茅屋春雨裏落花啼鳥東

風前我亦越王臺下客脫冠偶此南夷謫雲門六寺若
耶溪老眼畫中看歷歷何時與爾得歸田南湖北垞居
相連不惜東山謝公屐且迴雪夜子猷船

發松林驛

晨發松林驛蒼蒼百里深日高猶暝色風靜自韶音幽
鳥向人語流泉清我心何因素軒下一聽老龍吟

九日泊舟潯陽

去年重九日為客孟嘗門對菊動清酌吟詩開素軒流

光空自惜別意與誰論倚棹潯陽郭黯然銷旅魂

夢遊昆陽海口

碧雞山下路清夢記曾遊恠石行驚馬輕風穩送舟
轅門叨下客行縣有諸侯萬里遙相望聊登江上樓

李得全家賞薔薇

不喜尋花柳生憎泥酒杯因君以文會老我亦能來
未數金錢菊休誇蠟瓣梅東山不到久幾度為誰開

謝惠酒

美醪能遠致塵抱豁然開起向窓前坐風從竹下來莫
思身外事且進堂中杯飲罷復高卧冥心若死灰

次韻二首

靜觀天地情浩劫運元精雷動蟄蟲起雨餘新水生老
懷寬仗酒午夢短聞鶯身外元無物浮名真可輕

昨夜霜初重他方葉又黃蛩聲悲月冷客意怯風涼孤
嶼漁村外荒郵野戍傍因思舊遊處魚稻滿江鄉

次韻晚入五華寺

向晚尋幽寺明霞飛遠林
四山新雨歇一逕綠苔深
松老齊僧臘泉鳴和梵音
階前兩馴鹿去住識禪心

挽光古遠先生

獨騎玄鶴上丹丘為記釣天白玉樓
詩板刊成應自校草書零落有誰收
可能覓酒府中去無復攜筇寺裏遊
欲寄東風一行淚蜀江不肯向西流

挽鑑機先和尚

曾將一葦渡瀛洲信脚中原萬里遊
日出扶桑極東處

雲歸滇海最西頭，經留髣几香猶爇。棋歛紋楸子未收，老我飄蓬江漢上。幾回中夜惜湯休。

春暮

老眼看春得幾時，少陵從此典朝衣。烟籠芳苑迷胡蝶，月落空山叫子規。鄉國音書秋水濶，江湖親識曉星稀。沙邊白鳥能相近，應為年來已息機。

次韻

暖風晴日正春和，老眼看花感興多。久悟宦情如蝶夢，

已將心事付鷗波
門開野水新栽柳
身著宮衣舊賜羅
誰似山公習池上
春遊日日候鳴珂

次韻坐法正寺

野殿深沉生夏涼
博山一炷水沉香
素琴彈徹梅花引
山自蒼蒼水自長

楊宗彝

名彝紹興人

與友人同飲山閣

浮雲有聚散
山色無古今
床頭黃金不足貴
惟有管鮑

金匱尺 卷三
情何深與君久相別相見還復離鴻鵠肆遠志燕雀焉
能知君不見髮白難再黑水清終可渾向來朋舊半存
沒只今世態徒紛紜君當高歌我起舞直須醉倒花前
樽

寄桂宗敬

每見臨安客渾無故舊書客情都易老鄉誼未全疎夜
月鸞飛遠邊雲雁過初陶然樽酒外幽趣問何如

次松雨平先生韻

露下梧桐客夢醒夢中猶記在滇城尋山翫水連三月
聽雨吟風過二更斑白近來添老態文章千古總虛名
何時更剪西窓燭重把新詩與細評

謝惠華陽巾

仙人贈我華陽巾鶴髮輕籠雪色新行近花間添老態
照來鏡裏覺精神寧論錦里誇烏角絕勝東坡岸白綸
安得畫工圖小像水邊林下乞閑身

謝斗南禪師惠竹杖

扶桑禪子下蓬萊攜得仙人竹杖來瘦節只疑同鶴骨
虛心猶恐是龍胎衰年正賴扶持力異日須知變化材
不怕石頭溪路滑月明隨意步蒼苔

南城偶題

城南好山何太幽人家對門溪水流春禽啼樹野花落
雪瀑掛崖嵐翠浮長鏡自可劇靈藥短筇何必尋丹丘
一聲清嘯暮天碧松頂月明人倚樓

劉公柳溪詩

公庭宴坐無俗情楊柳蔭門春水生綠陰滿地惜春晚
飛絮撲簾疑雪聲解鞍樹下看洗馬流杯石上聽啼鶯
當今論治用材傑歸來未許陶淵明

寄鄧氏養拙齋

貴竹城中養拙齋開窓樹色映丹崖常時有約論幽事
幾歲無書慰老懷身逐暝雲登蜀道夢隨寒雨落秦淮
英才況出功臣裔早晚除書下玉階

送人還鄉

五十離鄉七十歸居民城郭是耶非青山自喜田園在
白髮應憐故老稀隣舍定攜新釀酒兒童不識舊戎衣
到家若有相思字為寄明年春鴈飛

早起

一聲殘角數聲雞南斗高懸北斗低多少行人度關去
東方曙色尚淒迷

劉叔讓

廣陵人

憶弟

漂泊嗟吾老，羈栖見汝難。
西風鴻鴈急，落日鵲鴿寒。
渭北書長絕，滇南淚不乾。
朝思兼夜夢，懷抱幾時寬。

夜雨述懷

憶昔驅馳不自由，山林猿鶴笑無謀。
十年世事渾如夢，一夜雨聲都是愁。
南詔羈栖傷短髮，東湖寥落憶扁舟。
釣磯別後知無恙，虛負同盟鷺與鷗。

題鎮南門城樓

排空雉堞接層樓，薄暮登臨萬古愁。
紅樹一村蒲匍晚，

黃雲滿地楚田秋江通平緬蠻烟重山聳高峰素霧收
極目鄉關何處是西風衰草思悠悠

送吳素齋還淮安

誰識齋居托意深脩然不受一塵侵半窓晴日閑觀易
滿座秋風靜鼓琴策馬已聞辭楚道揚舲還喜到淮陰
劉伶臺下多春色行樂應知稱素心

楊子善

天台人

過楊井山

霧盡寒初退風輕雨欲晴
山田春飽水農舍早趨耕
行
李青霄近烟波白髮明
正愁泥路滑林外竹雞鳴

早起

山樓早起已聞雞
雪漏寒光月色低
三點有誰憐柳下
四知徒自憶關西
街頭燈火催車馬
城上風霜急鼓鼙
臨鏡每慚多白髮
校書何日對青藜

江上秋懷

水國風高木葉霜
滿舟山色入荒涼
小孤殘照收江左

大別寒烟鎖漢陽
新飯軟炊菰米白
濁醪香泛菊花黃
故鄉千里空回首
雲樹茫茫鬢髮蒼

江夜

江山秋意滿虛舟
坐對漁燈看碧流
影浸星河天半落
涼生風露雨初收
椿庭有月烏啼夜
椒圓無人鶴怨秋
夢後鄉關徒悵望
越吟一曲強消愁

憶鄉中諸故友

東麓溪頭蟹渚陰
故鄉幾度憶同襟
詩聯石鼎秋燈冷

韭剪春園夜雨深
白髮每馳張敏夢
青山慵鼓伯牙琴
客床寥落情無賴
月滿空梁強自吟

書懷

舵樓空濶望京華
蘆荻江楓岸岸花
山色淡濃昏霧薄
水光浮沒夕陽斜
故鄉鴻鴈書千里
遠浦牛羊屋數家
邊塞柳營多首宿
石田復憶舊桑麻

題畫蘭

九畹香清露氣寒
三湘月落淚痕乾
楚天空濶秋無際

金匱要略卷三
誰復行吟澤畔看

張洪

字宗海
居人

悼貞婦

護衛中有貞婦憫其夫之勤役且乏饗殮乃剪
髮以供饋夫訊而知之極其愧慘因入卧内久
不出婦怪之入視已經死亦隨而盡聞者莫不
哀之聊述鄙詞

嘽嘽赴行役肅肅成謝功婦女既有歸雞犬亦相從寧

辭道路遠萬里來黔中邊城尚艱食太倉乏陳紅婦人
在中饋何以能尸饗良人漸黧黑慘淡筋力窮常恐卧
溝壑妾身何所終苟能事一飯豈惜膏沐容避人剪髻
鬟易米羞晨供良人久驚訝覩我顏色同窮辭訊衷曲
裏頭雲鬢空歎歎不下箸淚點微沾胸入怪久不出引
脰經房櫳仰呼不到天洒淚不及泉義當死生共恩始
夫婦全亭亭朱絲繩雙懸並頭蓮小哉匹夫諒妾昧不
足言念爾貞潔姿前後金石堅一貧不改節見義恐不

前婦道久不聞良心鬱未宣孰知蠻貊地超世爾獨賢
茲吟待良史悠悠千載傳

古東門行送別金彥楨

僕夫顧我悲轅馬跼不行古來離別地青草不復生居
人攀桃李悵望難為情流塵起阡陌遠樹花冥冥莫向
秦東亭唱此東門行土中有死骨聞之復心驚食荼莫
言苦飲醯莫言酸世間萬事易惟有離別難既辭還執
袂臨行復據鞍對面相寬解回頭涕已澗人生誰非客

何獨此哀歎但令長壽考相報各平安

拜謁黔寧王廟

曾聆玉帳肅徽音俯仰清祠感慨深
客袂尚餘他日淚羈懷不改舊時心
耳聞種德都成玉眼看栽松盡作林
每歲騎箕滇海上手分雲液散甘霖

荅俞都御史海上見寄二首

舳艫相接恨離居音問那堪只尺疎
見月思君應自切看雲憶我定何如
李膺舟楫神仙侶博望星辰太史書

歸去此懷同一洗賀家湖上醉紅葉

渺渺秋槎海上還洞簫吹月過三山九霄風露蓬壺裏
萬頃波濤祗席間地盡東南開帝域星環北極想天顏
夜闌五色雲光近回首扶桑不可扳

范宗暉

以字行
四明人

古意四首

茫茫宇宙間事物皆有理衆理具一心求之亦甚邇微
言寓羣經歷歷有根柢致知以力行典學念終始

人心固危殆况乃衆欲攻外誘日膠固乃蔽明與聰熾
然不可遏至理或銷鎔制之豈無術澹泊以為宗

積羽可沉舟羣輕能折軸巧言必譸張利口多翻覆詖
淫及邪遁害事為甚速苟不塞其源涓流蔽川谷

稂莠終亂苗珉瑜頗相類君子與小人顏面亦不異善
惡本殊途薰蕕豈同器辨之如不早斯為名德累

次喜雨詩韻

惟公鎮南服蒞政誠有為務農重民食注意恒在斯方

春忽亢旱惻然為憫之致齋禱羣祀雨降不愆時原野
動生意枯槁回芳姿溝澮盡溢川谷合深陂天道孰
云遠一念從可祈老懷深有感因之播聲詩手舞與足
蹈歡然不自知

謝賜衣

吳蠶作繭綠車鳴機中白苧新織成高堂捧出綺麗生
光彩奪目四座傾并刀裁就疊雪輕華裙曳地穩稱情
我歌白苧翻新聲移商換羽曲調清君不見夷門嬴三

千人中身獨榮
信陵當日倘未遇
安得千古遺芳名

鳴鳳歌

黔寧公子國之禎
遠鎮南服為干城
奇材異彙重題品
山川草木俱增榮
近從滇池得紫榆
錦紋玉質含霞頰
斲成琵琶極華麗
寶之不異金與瓊
鵠絃犀軫龍香撥
鴉青絛綰猩紅纓
方當下指曲未成
一座已聞驚鳳聲
初疑秦臺度蕭管
復似緱嶺隨匏笙
又如崑崙斷嶰竹
鳴雄應律相和鳴
大絃鏗鉤若呈瑞
喧呼雜遝聲鏗鏗

又疑喬林嗽竹實天風披拂飄琮琤小絃駢連如出穴
俄聞噦噦凌高冥忽若相呼飲醴泉餘音嫋嫋流春冰
大絃小絃或並作却疑啄碎瓊瑤英綵雲飄飄激遺響
百鳥不敢翔中庭開元玉環未足數大和忽雷空有名
何如公子製鳴鳳坐令六詔聞韶韻請從席上賦長句
願備樂府歌昇平

題春山勝覽

雄藩遠控西南陲地連六詔通諸夷山川形勝土肥沃

風氣頗與中國宜方當青陽播晴旭欣欣草木含華滋
溪毛雲骨動生意山光水色凝清暉花梢日明燦晴錦
柳條風煖綠輕絲鳥聲嚶嚶出幽谷物情和暢涵春熙
平疇水足夜來雨家家播穀勤菑畲維時統戎稍閑暇
省民問俗無遐遺按轡徐行過村疇雲旌翠節光陸離
邊氓久矣望風采馬前羅拜語喁喁勞徠慰撫殊未已
仁聲義澤淪膚肌比屋歡呼歌擊壤雍雍若在唐虞時
緬思先王拓茲土兵不血刃人心歸至今廟食重明化

代有陰陽安黔黎公今更欲敷政化非事逸豫耽遊嬉
我今作詩誦厥美太史觀風應採之

閑情

齋居無俗尚自愛適幽情風定樹陰合雨餘泉脈清枕
書雲伴卧步屨鶴隨行曾與隣翁約朝來共析醒

述懷

步屨緣蘿逕脩然鶴睡驚竹深清露滴樹杪白雲生飛
去誰家燕啼來何處鶯今朝新酒熟適足遂閑情

山莊小酌

別墅花初放，叨陪繡節過。
客如梁苑盛，地勝午橋多。
吟好詩先就，杯深臉易酡。
不因歸騎促，洗盞更聽歌。

齋居

齋居習靜晝初長，風暖閑庭薜蘿香。
日影到窓飛野馬，雲根採藥斲松肪。
年光荏苒閑方覺，學術迂疎老易忘。
珍重使君多軫念，徧題書札到山房。

送素軒公迎總戎自交趾回

上將班師自海墻將軍迎謁出南滇山河表裏歸中國
兄弟恩榮自九天凜凜星矛明曉日蕭蕭鐵騎帶寒烟
當年事業銘鍾鼎復見勲名著簡編

和僧中庭韻

平公卓錫滇海南出世有如優鉢曇庭前栢樹曾手種
堂下玉板容我參談禪直解心即佛從師獨見青出藍
隨身一瓶與一鉢碧山為伴雲為菴

題山水

初日照雲林寒泉落風磴緬懷塵外踪悠然動清興

滄海遺珠卷三

欽定四庫全書

滄海遺珠卷四

明 沐昂 編

施敬

字孟在
錢塘人

送姚臨湘舜絃

沙頭一樽酒含悽強言笑欲賦送君詩情深不能道蒼
茫波上日杳渺烟中棹望眼與江流悠悠接雲嶠

送性泉吳文學東還

結歡未云久詎盡平生語執手臨路隅離觴聊一舉殘
鍾草堂夕落鴈蘆洲雨相憶渺天涯深悰若為處

題梅得芳杏林圖

梅仙煉丹處山杏栽無數賣藥到人間衣裳帶紅霧花
開不知歲子落還成樹我欲與之言飄然騎虎去

貧樂軒

長卷束牛腰簞瓢繫牛角讀書深樹中不知山日落飲
水自知味採芝每盈握經世豈無心迂疎愧才薄白雲

渺在望幽興入遠壑浩歌歸去來空齋有薇藿

登碧雞山寄陸伯瞻劉子偉

碧雞山頂登臨處一片蒼烟迷海樹回首章臺若箇邊
青天不盡山無數欲倩西風吹鴈書拂雲遙寄故人居
書中草草無多字但道相思會面疎

梁山白雲卷為卞千戶題

梁山雲氣行如馬親庭正在雲之下十年遠宦隔天涯
日日瞻雲淚盈把白雲可望親不逢此心每與雲俱東

人生有親不能養金章壓肘輕如蓬白雲不定飛還止
堂上慈親念游子幾時路指梁山雲萱草花前奉甘旨

怪木竹石圖

大星墮地光如日一夜海風吹作石精衛魂驚不敢窺
留待媧皇補天極石傍老樹枯槎材古藤屈曲懸脩蛇
鷓鴣踏翻黃竹葉翡翠啄破蒼苔花千年醜怪何人識
老剛甯次真奇特興來掀倒墨池波鬼跡神踪不能匿
生綃颯颯搖秋颼古色慘淡寒無姿天吳拔斷蛟龍尾

月露洗出珊瑚枝張公好古耽清賞狂客題詩真技癢
冥驅萬象入毫端便覺蕭韶畫中響琅玕有寶石可栖
赤霄靈翽來何遲按圖為君三歎息碧雨打門風捲席

送人還廣陵

會晤情方洽睽違意更長天涯同是客秋杪各還鄉黃
葉飛揚子青山繞夜郎分襟即萬里相顧兩茫茫

歸燕

已知秋社近更繞畫梁飛主意豈不念天時難獨違雙

歸遼海遠對語夕陽稀花雨重來日故巢還是非

次瞿塘峽

鑿鐵開青壁翻雲瀉素波古今流不盡造化意如何晚
策天邊倚春帆地底過禹功不可問日暮獨長歌

寄浙江王氏得月樓

跨鶴仙人冰雪顏結樓宴坐月中閑笙聲夜響聞天外
桂子秋香落座間斜日黃來漁浦樹隔江青度海門山
西風滿抱登臨興攜酒何時一往還

寄伯瞻

別後悠悠渺所思使來渾不寄新詩
雲林一去無多地風雨相違又許時
茱萸綠深江路草枇杷黃盡客窓枝
多情惟有西齋月曾照清宵醉酒卮

沙津送客登望江亭

沙市津頭送歸客西風江樹數蟬鳴
夕陽靄靄衆山暝秋水迢迢雙鷺明
蔓草已蕪王祭宅亂雲長繞呂蒙營
登臨不是攜尊酒若箇能平慷慨情

送譚孟端

靡蕪葉齊春水生故人欲歸傷我情
草堂酒盡落花滿山驛馬嘶殘月明
醉中執手不忍別路上逢人須寄聲
明朝相望隔關塞惟見白雲天際橫

秋塘曲

蓮謝秋塘晚風來野水香
采蓮休采葉留蓋睡鴛鴦

楚畹春風

九畹消殘雪光風汎國香
美人不可見春草徧沅湘

巴陽夜泊

獨棹三巴夜秋高片月孤灘聲將客夢萬里下東吳

塞上曲

八月秋高塞草斑將軍千騎獵前山彎弓不射南飛雁
恐有征人附信還

南行途中寄錢塘親友

萬里移家入瘴烟故鄉音耗若為傳衡陽自古無來鴈
況去衡陽又八千

曹溪夜泊

空山孤驛鼓逢逢
明月流輝滿大江
水鳥夜寒栖不穩
一雙飛影過蓬窓

漁人

浪跡烟波薄利名
釣舟長傍酒家橫
白魚青菜桃花飯
不識憂愁過一生

讀程原道昆陽詩悵然有懷

昆陽市上美人家
飲酒曾傳過客車
萬里相思不相見

東風吹盡蜜檀花

試筆

試筆山窓竹影涼
閑臨小字換鵝章
定巢燕子時飛過
帶得殘花落紙香

僧天祥

日本
人

寄南珍

上人居處僻心與石泉清
道在從違俗身閒不用名
空階松子落雨逗蘚花生
怪得稀相見年來懶到城

題龍闕水樓

此樓登眺好終日俯平湖葉盡村村樹花殘岸岸蘆漁翁晴獨釣沙鳥晚相呼何處微鐘動雲藏島寺孤

次韻惟心見寄

世間無住著林下且栖遲映戶幽光發侵階亂竹垂老年銷記性餘習未忘詩此意難為說西峰道者知

贈李生

異域無親友孤懷苦別離雨中春盡日湖外客歸時花

落青山路鶯啼綠樹枝
從今分手後兩地可相思

送僧歸重慶

東西千萬里來去一身輕
碧鳳山前別黃梅雨裏行
江長巴子國地入夜郎城
昔我經過處因君動遠情

哭宋士熙

衆山搖落日那忍哭先生
老眼非無淚深交最有情人
猶惜才調天可厭聰明書法
并詩律空留後世名

呈同社諸友

君住峰頭我水濱相思只隔一孤雲
夜燈影向空中見晨磬聲從樹杪聞
咫尺誰知多役夢尋常心似遠離羣
今朝偶過高栖處坐接微言到夕曛

夢裏湖山為孫懷玉作

杭城一別已多年夢裏湖山尚宛然
三竺樓臺晴似畫六橋楊柳晚如烟
青雲鶴下梅邊墓白髮僧談石上緣
殘睡驚來倍惆悵可堪身世老南滇

長安春日作

何事長安客春來思易迷樂遊原上草無日不萋萋

榆城聽角

十年遊子在天涯一夜秋風又憶家恨殺葉榆城上角
曉來吹入小梅花

暮春病懷

落花滿地雨絲絲九十春光又別離行樂送春猶有恨
那堪多病過花時

僧機先

日本
人

寄西山石隱

碧雞山上雪想可埋岩房老僧凍不死燒葉生微陽我
欲往從之杳杳川無梁日落尚延佇心隨歸鳥翔

長相思

長相思相思長有美人兮在扶桑手攀珊瑚酌霞氣口
誦太乙朝東皇鯨波摩天不可航矯首欲渡川無梁去
時遺我瓊瑤章蠻牋半幅雙鴛鴦鴛鴦不飛墨色改攬
涕一讀三斷腸前年寄書吳王臺西湖楊柳青如苔今

年東風楊柳動鴻鴈一去何當回欲彈朱絃絃斷絕欲
放悲歌聲哽咽孤鸞夜舞南山雲花漬簾前杜鵑血思
君不如天上月夜夜飛從海東出月明長傍美人身美
人亦近明月輪褰衣把酒問明月中宵見月如見君長
相思長如許千種消愁愁不舞亂絲零落多頭緒但將
淚寄東流波為我流入扶桑去

寄仲翔外史

天涯又索居歲晏近何如遠水蒼茫外空山寂寞餘老

逢諸事懶病覺故交疎想見多閑暇應修輔教書

送別

天書召賈生匹馬出滇城白首相逢處青雲送別情山
經巫峽盡水到楚江平好獻治安策殷勤荅聖明

挽遼光古先生

昨日來過我今朝去哭君那堪談笑際便作死生分曠
達陶徵士蕭條鄭廣文猶憐埋骨處西北有孤雲

梁王閣

在碧雞山下

碧雞飛去已千秋聞說梁王曾此遊洞口仙桃迎鳳輦
岩前官柳繫龍舟青山有恨人何在白日無情水自流
豈識當時歌舞地寒烟漠漠鎖荒丘

滇陽六景

金馬朝暉

峇嶺金馬在城東黛色蒼涼淡墨中畫角聲消殘月白
陽烏影動早霞紅梁王去國荒丘在漢將開邊古道通
豈料長為南竄客朝朝相對獨為翁

碧雞秋色

碧雞西望水天虛漠漠秋光畫不如翠壁烟華搖浪處
丹崖樹色著霜初前朝有閣今遊鹿落日何人獨釣魚
却訝維舟滛浦上芙蓉九疊看匡廬

玉案晴嵐

山如玉案自為名卓立天然刻畫成白晝浮嵐濃且淡
高秋疊翠雨還晴陰連太華千尋秀影浸滇池萬頃清
杖策何當凌絕頂滇南一覽掌中平

滇池夜月

滇池有客夜乘舟渺渺金波接素秋
白月隨人相上下青天在水與沉浮
遙憐謝客滄洲趣更愛蘇仙赤壁遊
坐倚蓬窓吟到曉不知身尚在南州

龍池躍金

路入商山境更奇玉皇壇畔有龍池
行逢柳色烟深處坐看桃花水漲時
映日金鱗鳴撥刺含風翠浪動淪漪
由來神物非人擾變化雲雷未可知

螺峯擁翠

螺峯近在滇城裏下有招提倚翠屏
雨後光含僧眼碧雲中色擁佛頭青
層崖鳥度開天險古洞龍潛闕地靈
自是幽深回俗駕不須重勒北山銘

除夕

昔聞蘧伯玉行年六十化吾道竟如何
悠悠日又夜

寄石隱

古木積蒼烟空山夜悄然遙知崖上月
獨照病中禪

聞笛

夜深吹笛是誰家獨倚高樓月欲斜
塞上春情無賴甚那堪又聽落梅花

送僧歸石城

月照空山鶴在松夢中猶聽石城鐘
今朝又向江頭別目斷孤雲意萬重

雪夜偶成二首

畫角聲殘曙色遲雪花如掌朔風吹吟中
二十年三昧

金少卿集卷四
未了梅花一首詩

定起閑吟獨倚闌朔風吹面雪漫漫修心不到梅花地
耐得山中一夜寒

僧大用

日本

挽達光古

氣宇自豪邁孤超傲世時冥鴻冲漢志野鶴出塵姿
勢雲烟起詩名草木知論交三十載死別抱長悲

滄海遺珠卷四